

Sakspapir

Saksnr	Utvalg	Type	Dato
114/22	Formannskapet	PS	05.12.2022

Sakshandsamar	Arkiv	ArkivsakID
Ketil Tjore	FE-033	22/1162

Orienteringssak

Framlegg til vedtak:

Formannskapet - 114/22 - 05.12.2022

FS - behandling:

Arne Kringlen og Marie Anderson frå Norconsult orienterte om "Moglegheitsstudie for Øksnesmarka".

Inger Lise Brekke (H) spurte om myr og bevaring av myr, om det har større betydning for miljø og klima no enn før, og korleis er dette teke med i arbeidet?

Kringlen svara at dette er med i eit klimarekneskap som skal lagast, skal prøva å rekna ut dette. Samstundes er det forskjell på myr og myr, det er djupne og anna som må komma fram i den kartlegginga som skal gjerast. Brukar den siste anerkjente metodikken som er brukt.

Bjørn Inge Håland Dyrkolbotn spurte om kva metodikk ein har, feltarbeid eller anna.

Kringlen svara at det vert henta inn verdiar, og så vert dette lagt inn på skalaen, så ser ein inngrepet opp mot dette og lagar den likninga som gjev konsekvensen av inngrepet. Enkelte verdiar kan ha svært stor verdi, men om inngrepet har lite å seia vert konsekvensen liten. Så er det motsett om inngrepet tar vekk heile den aktuelle verdien.

Per Lerøy (Ap) spurte om avbøtande tiltak er med, Kringlen svara at både avbøtande og kompensierende tiltak er med i dei vurderingane som vert gjort. Kan vera avbøtande tiltak som også ligg utanfor sjølve planområdet.

Helge Dyrkolbotn (KrF) spurte om trafikkavviklinga, reknar med at det er hovudvegen som skal brukast for bortkøyning av masser. Kva om det kjem krav frå Statens vegvesen, kjem det med i vurderingane?

Kringlen svara her at det vert teke med i kartlegginga om det må gjerast noko med eksisterande vegnett, og eventuelt kva som må gjerast.

Marie Anderson frå Norconsult orienterte nærare om dei tiltaka som er skisserte, som landbasert fiskeoppdrett i samankopling til eit fjøs for ammekyr, og viste skisser for ulike satsingar som kan gå

under nemninga subsidiærøkonomi.

Helge Dyrkolbotn (KrF) spurte om tidshorisont for utbygging av området. Representantane frå Norconsult svara at dette må komma i den politiske handsaminga, men der kan eit stilla krav om korleis det skal sjå ut undervegs, og setta tidskrav og rekkjefølgjekrav.

Per Lerøy (Ap) sa at det ikkje skal vera steinuttaket, men eit næringsområde for framtida. Viste til at det er biogassproduksjon på Stord, som er ein suksess med mottak av husdyrgjødsel og fiskeslo som råvare for produksjon av biogass.

Inger Lise Brekke (H) spurte om subsidiærøkonomi er ein suksess andre stader.

Marie Anderson frå Norconsult svara at det er i startfasen enno, men det er interesse for å etablera denne typen næringar.

Inger Lise Brekke (H) repliserte at det verkar litt diffust, kva skjer om berre noko vert etablert, vil det rettferdiggjera inngrepa i naturen der?

Representantane frå Norconsult svara at ein vil ta i bruk det område som vil vera aktuelt for den drifta ein skal ha, og laga ein faseplan for korleis ein skal opna opp dette området. Om ein ikkje skal ha ein spesiell aktør her no, så prøver ein å laga spennande planar som kan vera aktuelle for fleire aktørar.

Morten Sognnes (H) sa at denne utbygginga er eit miljøtiltak som ein må støtta med full kraft.

Per Lerøy (Ap) sa at det er problem med lakselus i Nordhordland, og skal ein produsera laks berekraftig så er det anten på land, i utsleppsfrie anlegg i sjø eller i nedsenka merdar i sjø. Alt dette er kvalitetar ein kan klara både i og ved Øksnesmarka, sidan det er djupt rett utom og mogleg å produsera både i og ved sjø. Også betre dyrevelferd med mindre lakselus.

Inger Lise Brekke (H) spurte om det kan vera problem med støy, er det mogleg å sjå dette frå tilsvarande anlegg andre stader.

Marie Anderson frå Norconsult svara at det må inn i konsekvensutgreiinga, ein må ta opp og diskutera dette med støy.

Per Lerøy (Ap) sa at ved liten byggetid vil det gje mindre konsekvensar, alle vil vera interesserte i kort byggetid.

Inger Lise Brekke (H) viste til at det ikkje berre er bygginga, men også drifta i etterkant, og trafikk med meir.

Arne Kringlen frå Norconsult sa at alle konsekvensar skal vurderast, men alt av utvikling og anlegg vil gje konsekvensar for nokon. Må kartlegga kva som er konsekvensane og kva avbøtande tiltak ein kan få til. Kva er akseptabelt og kva er ikkje akseptabelt.

Per Lerøy (Ap) viste til at det hadde vore noko uro i forkant av biogassanlegget på Stord, men der var det ikkje noko uro når anlegget kom i drift.

Til dette sa Marie Anderson frå Norconsult at dette med biogass kan ein ta nærare med i utgreiinga.

Morten Sognnes (H) sa at ein må jobba for dette. Treng ikkje vera negativt for dyreliv, er dyreliv tett på Equinor Mongstad.

Per Lerøy viste til at det må takast omsyn til i planarbeidet, då treng det ikkje bli så kostbart i etterkant. Mulighetsstudien som skal lagast, blir ein del av planprogrammet.

Dagleg leiar i Aufera, Kari Smith, orienterte om drifta og gjeldssituasjonen ved verksemda.

- Smith presiserte i innleiinga at Aufera ikkje har misleghalde gjeld eller sendt noko rekning til Alver kommune, men det er økonomiske utfordringar for verksemda.
- Er ei del kostbart utstyr som trengs, driv på same krava som andre med tanke på vask av arbeidstøy for ulike kundar og liknande.
- Er ein del ting som er krevjande med drifta, ser ikkje at det er mogleg å spara inn meir enn det ein gjer.
- Har komme seg i nye lokale, med brukte møblar til arbeidsplassar og personalrommet.
- Flyttinga var eit løft økonomisk, men drifta ville ikkje fungert utan.
- Ser at det er nokre som vil slå saman desse VTA-bedriftene, men Aufera klarer seg bra sjølv. Fusjonering vidare vil gje meir samling, trur ikkje det er bra. Det er langt frå Fedje til Knarvik og Frekhaug, og det er viktig med ein lokalitet i denne delen av regionen.
- Det som er utfordringa er lånet Aufera har, klarer å betala men ba om å utsetja det eine avdraget.
- Det er ikkje nok å baka fleire lefser eller vaska meir klede. Kommunane må på bana, og kjøpa fleire plassar. Alver kjøper plassar hjå Kim og Gløde, men ikkje av Aufera, berre tenester. Det er viktig at kommunane kjøper plassar av Aufera, det er det som monnar. Trur at det til slutt er rimelegare for kommunane å bruka Aufera enn å bygga opp eit tilbod sjølve.

Ordførar Per Lerøy (Ap) viste til eigarmøte der Alver lova å ta opp dette med kjøp av plassar, Smith svara at ein ikkje har komme noko vidare enno med dette.

Ordførar Per Lerøy (Ap) sa at ein hadde forstått det slik at det ikkje er krise enno. Smith svara at det er krevjande, og utan avtalen med Austrheim hadde det vore verre.

Ordførar Per Lerøy (Ap) sa at det tidlegare er gitt driftsstøtte, det er eit tiltak som kan vurderast heller enn at ein kanskje må innfri garantien.

Inger Lise Brekke (Ap) spurte om det er fleire som har behov for plass på Aufera.

Kari Smith svara at det er enkelte som er til vurdering for plass på Aufera. Sa vidare at Arbeidssenteret hjå Austrheim kommune heller skulle vore kalla eit aktivitetssenter eller dagsenter, det er litt villeiande å kalla det eit arbeidssenter. For dei som skal jobba på Aufera er det krav til at dei har ei restarbeidsevne.

Helge Dyrkolbotn viste til dei tilbakemeldingane RMNF får om at dei som er på Aufera trivst godt, Aufera gjer ein god og viktig jobb. Andre kommunar må også stilla opp slik at ein kan sikra denne tenesta på ein god og trygg måte. Håpar at ein kan komma ut av dette uføret.

Per Lerøy (Ap) viste til at han som ordførar er med på Aufera sitt julebord, og møter stolte arbeidstakarar der som er krye over den jobben dei gjer i samfunnet.

Kommunedirektør Bjørnar Fjellhaug sa at det var bra med ei slik orientering. Viktig om Aufera er raske tilbake med tilbakemeldingar om det skjer noko meir i denne saka.

Per Lerøy (Ap) viste til at dei andre eigarkommunane har fått tydeleg beskjed også tidlegare frå Aufera.

Kari Smith sa at politikarane er hjarteleg velkomne til å komma inn på Aufera og sjå korleis dei driver.

Einingsleiar teknisk drift, Rolf Henning Myrmel, orienterte om ulike prosjekt:

- Framdrift om kloakkpumpestasjonar med meir. Må ta noko førebunde omlegging av hovudvassleidningen til høgdebassenget på Årås, i tilfelle dagens leidning ryk under det arbeidet som skal gjerast. Har sprengt ut noko for ny hovudvassleidning/gangveg Åråsvågen til Åråsfeltet, sidan det er best å gjera dette før ein får på plass ny kloakkpumpestasjon i Åråsvågen.
- Gangvegen frå Nordliheimen til Seniorsenteret, her krov fylket eit meir utvida teikningsgrunnlag, det er sendt over men har ikkje fått svar frå fylket enno. Purrar på dette vidare, kommunen er klar for å starta opp. Har ein trasé som kan brukast utan å flytta høgspenteleidning som ligg i bakken.
- Skuleutbygginga på Årås er godt i gang. Klarmed ringmur, reisverk startar ein på i veke 49. Ei endring som er gjort er å leggja kloakken litt annan veg enn tenkt tidlegare, for å sleppa å ta opp golv i eksisterande bygningsmasse. Denne fløyen vil no ha avløp uavhengig av resten av bygget, kan vera ein føremon om noko skjer med kloakken.
- Utbygging Kaland skule, Kaland 3 er så godt som tømt og ein er i gang med riving og flytting av det som skal gjerast. Toalettanlegget skal rivast om ei veker tid. Ser at det dukkar opp utfordringar som må løysast undervegs. Vassboren varme skal inn i Kaland 3, ser at det er lite høgde til å gjera det slik ein ønskjer, det er ikkje høgde nok i korridorane under ventilasjonsanlegget til å bygga opp golv slik ein hadde tenkt.
- På Kaland har ein sett på skifte av ventilasjon i barnehagen, men vil heller få dette innunder felles ventilasjon for heile skulen med lågare utgifter på sikt. Elles tek ein isolasjon og anna som er viktig for driftsutgifter, maling kan ein ta seinare.
- På spørsmål frå Helge Dyrkolbotn om støtte frå Enova til skuleprosjekta, svara Myrmel at dette er noko Norconsult skal sjå på.
- Nordhordland Grunn og betong skal ta transporten av steinmassar frå den utvida Lindås transformatorstasjon til den kommunale tomte ved Mongstad-krysset der steinen skal brukast til masseutskifting, jorda skal køyrast vekk. Kommunen ser på om ein skal bruka fastpris eller timepris på den delen av arbeidet som kommunen skal ta, ser ut for at timepris er det enklaste å halda seg til. Skal ta i mot 20.000 kubikkmeter stein.
- På spørsmål frå Helge Dyrkolbotn (KrF) svara Myrmel at arbeidet på trafostasjonen startar i februar/mars, så tilkjøring av stein vil starta utpå våren.
- På spørsmål frå Morten Sognnes (H) om knausane på tomte svara Myrmel at desse ikkje skal fjernast no.
- På spørsmål frå Per Lerøy (Ap) svara Myrmel at er det ikkje sett noko teikn kostnadssprekk på skuleprosjekta per no. På Kaland var det lagt inn buffer til eventuelt. Men må vera klar over at det ikkje er alle veggjar på skulen som skal pussast opp, ein tek dei flatene som er med, men ikkje alle flater.

Kommunedirektør Bjørnar Fjellhaug orienterte:

- KS sitt debathefte kjem med i budsjettmøtet i desember
- Legevakt, Alver kommune har sagt opp avtalen om legevakt. Ventar på eit notat frå kommunedirektøren i Alver om at dagens avtale gjeld til ny er klar, og ventar så at ny avtale kjem til kommunestyret i Austrheim i februar 2023. Ny avtale trer i kraft når alle kommunar har godteke denne. Austrheim har bedt om klarare tal om bruken av

legevakten.

- Kommuneoverlege Peter Kubon er tilbake permisjon frå 5/12, og går inn i 50 prosent stilling som kommuneoverlege frå nyttår. Ikkje kurativ verksemd.
- Austrheim får 5,2 millionar frå Havbruksfondet, hadde budsjettert med 1,6 millionar. Rett å budsjettera konservativt med desse midlane, som kan vera usikre. Kjem meir om økonomi i møtet i kommunestyret 15/12.

Kommunalsjef Trine Merete Jansen orienterte om flyktningar:

- Austrheim har tatt i mot 26 personar, ein av desse har returnert til Ukraina, så ein har halde seg til 25 som kommunestyret har sagt i sitt vedtak.
- Ikkje alle har komme enno.
- Er vanskeleg å finna bustader, det er noko som vert jobba med.
- Flyktningane går inn i introduksjonsprogrammet, men det er gjerne vanskeleg å sikra språkpraksis.
- Integrerings- og mangfaldsdirektoratet (Imdi) oppmodar Austrheim til å ta imot 20 flyktningar i 2023.
- Austrheim har plass på skule og i barnehage, og har auka noko på kapasiteten i vaksenopplæringa, det er busettinga som er utfordringa. Er også andre som har vanskar med å komma seg inn på bustadmarknaden, så kommunen kan gjera det vanskelegare for desse ved å ta i mot fleire flyktningar.
- Av dei 17 som er på plass er 5 barn, det kjem ytterlegare 3 barn av dei som kjem i januar.
- Per Lerøy (Ap) sa at ein berre må oppmoda folk til å stilla bustader til rådvelde, det kan også vera fritidsbustader i tilfelle der desse har gode nok kvalitetar til å vera faste bustader.

Handsaming i formannskapet:

Kommunedirektøren sitt framlegg vart samrøystes vedteke

FS vedtak:

Orienteringane vart teke til vitande.

Saksopplysninger: